

МЕСЯЦА ИУНИА В 11-Й ДЕНЬ.

ПРАЗДНОВАНИЕ ПРЕСВЯТЕЙ ВЛАДЫЧИЦЕ НАШЕЙ БОГОРОДИЦЕ РАДИ ЧУДОТВОРНОЙ
ЕЙ ИКОНЫ, НАРИЦАЕМОЙ «ДОСТОЙНО ЕСТЬ», И В ВОСПОМИНАНИЕ БЫВШАГО ОТ
АРХАНГЕЛА ГАВРИИЛА ЧУДЕСЕ

НА МАЛОЙ ВЕЧЕРНИ

На Господи, воззвах: стихиры, глас 4.

Подобен: Дал еси знамение:

Приидите ныне, празднующи, * монашествующих сословие, * приидите, *
песньми воспоем, * имже нас Архангел научи пети Чистой Деве, * приидите,
совоспоем тепле Тоя Божественная великодеяния * и любовию ублажим воистинну
Присноблаженную * во храме Тоя днесь Протатством веселящися.

Песнь, юже Архангел Гавриил * яко предначатие к песни Космы воспе, *
плещуце, Богомудрии, * днесь благогласне воспоем, * любовию и благоговением
вкупе * Тоя великое сие чудо, * еже днесь он соверши в келлии пения, * монаха бо
послушника песни странней научи.

Ныне Тя блажим, Присноблаженная Владычице, * и верно покланяемся Твоей
иконе всечестней, * Хранительнице Горы, * пред Неюже образом странным
Гавриил * с Небесе внезапно предста и воспе, * еже достойно есть пети и блажити *
Тя, Матерь Создателя.

Слава, и ныне, глас 1:

Возвеселитесь днесь, * множество пустынножителей и общежителей Святыя
Горы, * и възграйте, веселящися, * благодарственная Деве припевающе. * Се бо
промыслиением Своим чрез Ангелово пришествие * ангельскую песнь нам
востанови. * Достойно есть яко воистинну блажити и чтити Ю, * яко
Матерь сущую Творца всех, * Христа Бога нашего, * высшую Херувим и Серафим
святейшую без сравнения сущую * и спасающую от бед души наша.

На стиховне стихиры, глас 2.

Подобен: Доме Евфрафов:

Достойно воистинну есть, * Богородице, * присно Тя блажити, * Бога Матерь, *
спасающую чтущих Тя.

Стих: Помяну имя Твое * во всяком роде и роде.

Икона всеславная * Матере Бога Слова, * Покровительнице Протата, * покрывай
нас, * сохраняющи от всяких скорбей.

Стих: Лицу Твоему помолятся * богатии людстии.

Архангел Гавриил, * с Небесе пришед, * пред честною иконою * песнь
ангельскую, * Чистая, Тебе воспе.

Слава, и ныне, глас и подобен тойже:

Упование христиан, * Пресвятая Дево, * благодатию Твоя иконы * от всякаго
вреда * Твоя рабы соблюдай.

Тропарь писан на велицей вечерни.

НА ВЕЛИЦЕЙ ВЕЧЕРНИ

На Господи, возвах: 8 стихирь, глас 1.

Подобен: О, дивное чудо:

О, дивное чудо! * Бог, Иже из Тебе воплотивыйся, * благоволи песни Твоей ныне, Чистая, предначатися. * Сего ради Гавриила ко иноку * в подобном образе посла * песни Твоей научити, * иже прежде вопияше Тебе: * Благодатная, радуйся, с Тобою Господь, * подай миру Тобою велию милость. [Дважды.]

О, Твоих чудес, Чистая! * Вышняго Мати показала еси, Владычице. * И ныне с Небесе промыслиением Твоим * послан бысть странным образом * песни Твоей научити, Всенепорочная, Архангел Гавриил, совершеннейше, * иже прежде вопияше Тебе: * Благодатная, радуйся, с Тобою Господь, * подай миру Тобою велию милость. [Дважды.]

Твое славим промыслиение, Богомати Дево, * нас бо научила еси предначатию дивному * яко воистинну песни Твоей * Божественнаго ныне Гавриила * пришествием странным, Всенепорочная. * Припадающе убо верно, * Тебе взываем, с ним вопиюще: * Благодатная, радуйся, с Тобою Господь, * подай миру Тобою велию милость. [Дважды.]

О, дивное чудо! * Гавриил светозарный * во образе иночестем явися иноку, * в келлии оставшуся, * восприим чудно Твоей песни предначатие, Всенепорочная. * Начерта же абие на дщице каменной рукою поемая, * невидим же потом быв, * во удивление приведе монашествующаго, * еже славити Тя, Всепетая! [Дважды.]

Слава, и ныне, глас 4:

Подобаше Горе сей Афонстей, * Тебе Предстательницу имущей, Богомати, * еже сию песнь Твою, Дево Всепетая, * Архангелу первейше в ней воспети * и отсюду в концы вселенныя протещи, * к составлению песней Богоматерних. * Темже вопием Ти: * Богородице преславная! * Твоего Сына моли, * во еже спастися душам нашим.

Вход. Прокимен дне. И чтения три Богородицы.

Бытия чтение (глава 28):

Изыде Иаков от студенца клятвеннаго и иде в Харрань. И обрете место, и спа тамо. Зайде бо солнце, и взят от камня места того, и положи возглавие себе, и спа на месте оном. И сон виде, и се лествица утверждена на земли, еяже глава досязаше до Небес, и Ангели Божии восходяду и низходяду по ней. Господь же утверждашеся на ней и рече: Аз Бог Авраамов, отца твоего, и Бог Исааков, не бойся: земля, идеже ты спиши на ней, тебе дам ю и семени твоему. И будет семя твое, яко песок земный, и распространится на море, и ливу, и север, и на востоки, и возблагодарят о тебе вся колена земная и о семени твоём. И се Аз с тобою, сохраняяй тя на всяком пути, а може аще пойдеши, и возвращу тя в землю сию, яко не имам тебе оставит, дондеже сотворити ми вся, елика глаголах тебе. И воста Иаков от сна своего, и рече: яко есть Господь на месте сем, аз же не ведех. И убояся, и рече: яко страшно место сие, несть сие, но дом Божий, и сия врата Небесная.

Пророчества Иезекиилева чтение (главы 43 и 44):

Тако глаголет Господь: будет от дне осмаго, и прочее, сотворят иереи на олтари всесожжения вашего и яже спасения вашего, и прииму вы,— глаголет Адонай

Господь. И обрати мя на путь врат святых внешних, зрящих на востоки, и сия бяху затворена. И рече Господь ко мне: врата сия затворена будут и не отверзутся, и никтоже пройдет сквозе их, яко Господь Бог Израилев пройдет ими, и будут затворена. Яко игумен сядет в них снести хлеб, по пути еламских врат внидет и по пути его изыдет. И введе мя по пути врат святых, сущих к северу, прямо храму, и видех: и се исполнь славы храм Господень.

Притчей чтение (глава 9):

Премудрость созда Себе дом и утверди столпов семь. Закла своя жертвенная, и раствори в чаши своей вино, и уготова свою трапезу. Посла своя рабы, созывающы с высоким проповеданием на чашу, глаголющы: иже есть безумен, да уклонится ко мне. И требующим ума рече: Приидите, ядите мой хлеб и пейте вино, еже растворих вам. Оставьте безумие, и живи будете, и възыщите разума, да поживете, и исправите разум в ведении. Наказуяй злыя, примет себе безчестие, обличай же нечестиваго, опорочит себе, обличение бо нечестивому, раны ему. Не обличай злых, да не возненавидят тебе; обличай премудра, и возлюбит тя. Дажь премудрому вино, и премудрший будет; сказуй праведному, и приложит приимати. Начало премудрости – страх Господень, и совет святых – разум. Разумети бо закон помысла есть благаго, сим бо образом многое поживеши время, и приложатся тебе лета живота.

На литии стихиры, глас 1:

Девственное торжество днесь, братие! * Да играет Афон, * да ликовствует Церковь! * Созва бо нас Святая Богородица * на летний праздник странных песней Ея, * Гавриилу Архангелу нас научившу * страннообразне Божественныя песни Ея предначатию. * Тако бо, явлься иноку в подобнем образе, * Богородицу возвеличи, * яко Суцаго на Херувимех с телом носившую. * Тоя молитвами, Христе Боже, спаси души наша.

Глас 2: Яже Небес Высшая сущи, * и Херувим Славнейшая, * и вся твари Честнейша, * Яже премногия ради чистоты * Присносущнаго Естества приятелище бывши, * во обители Ея днесь от Ангела величается песньми, * и тем исполняются всяческая радости, * и нам даруется велия милость.

Всенепорочная Невеста и Мати благоволения Отча, * Богом предопределенная Тому в жилище, * днесь странную слуху песнь * чрез Архангела нам предает, * Юже Безплотныя силы непрестанно славят, * и мы ублажаем, яко Богородицу, * воистинну Присноблаженную и Всенепорочную * и Матерь Бога нашего.

Слава, и ныне, глас 5:

Воспойте, людие, * Матери Бога нашего, воспойте. * Днесь бо Архангел песнь новую Пренепорочныя Девы * монаху уединенному воспе, * Юже и чтити непрестанно должны есмы вси, * Заступницу нашу сущую.

На стиховне стихиры, глас 1.

Подобен: Небесных чинов:

Небесных чинов предначальника, * Тебе Гавриила Божественнаго * Бог прежде, Дево, посла, * принести, Отроковице, Твоего неизреченнаго зачатия благовестие, * ныне же песни Твоей научити предначатию.

Стих: Помяну имя Твое * во всяком роде и роде.

Кто достойно, Дево, повесть странное сие чудо, * бывшее во славу Твою, Отроковице? * Ибо предназначавший песнь Твою * чудными похвалами Тебе, * явился во образе инока ныне Ангел, * тако пети глаголя всем.

Стих: Лицу Твоему помолятся * богатии людстии.

Тя блажити, Дево, еси достойно, * яко воистинну Божественный Гавриил воспе, * Чистую Богородицу, Блаженную и Пренепорочную, * воистинну Матерь сущую Тя Божию, * Юже в песнях величаем.

Слава, и ныне, глас 4:

Песнь, еяже не веде, * услыша ныне монашествующий, * сказа бо ему Архангел * песни Твоя, Дево, предназначатие. * Темже удивляясь, монах * просяще сему предатися и в письмени. * Сего ради на дщице каменной рукою начертав * и потом невидим быв, * в радости воспевати Тя присно Богородицу устрои.

Тропарь, глас 4:

Отцев все Афонское множество, * соберитесь, верно празднующе, * днесь радующесе и светло восклицающе вси в веселии, * Божия бо Мати ныне от Ангела преславно воспевается. * Темже, яко Богородицу, присно Сию славим.

Ин тропарь, глас тойже:

Притецем, вернии, со дерзновением * к милующей Царице Богородице * и умильно воззовем к Ней: * низпосли на ны милости Твоя богатя: * Церковь нашу сохрани, * люди во благоденствии соблюди, * землю нашу избави от всякаго обстояния, * мир даруй миру * и спасение душам нашим.

НА УТРЕНИ

На Бог Господь: Тропарь Богородице, глас 4:

Отцев все Афонское множество, * соберитесь, верно празднующе, * днесь радующеся и светло восклицающе вси в веселии, * Божия бо Мати ныне от Ангела преславно воспевається. * Темже, яко Богородицу, присно Сию славим. [Трижды.]

По 1-м стихословии седален, глас 1.

Подобен: Гроб Твой, Спасе:

Все множество отцев Афонских собрася ныне светло воспети Твое, Отроковице, славное торжество. * Днесь бо начальник Ангелов * предначатие песни Твоея преславно нам возвести.

По 2-м стихословии седален, глас 4.

Подобен: Удивися Иосиф:

Гавриил с Небесе прежде послан бысть Тебе, Чистая, * благовестити Твое безсеменное зачатие страшное. * Той и ныне во образе монашествующаго явися яве * научити песни Твоей, и сию чудно начерта. * Сего ради вси с пустынниками и общежителами Афона вопиим: * радуйся, Юже воспевают чини Ангельстии.

Величание:

Достойно есть * величати Тя, * Богородице, * Честнейшую Херувим * и Славнейшую * без сравнения Серафим.

По полиелеи седален, глас 3.

Подобен: Красоте девства:

Афона ныне все множество веселится, празднуя светлое торжество, * Богородицу воистинну уведев Тя блажити, * Присноблаженную и Чистую, Всенепорочную и нескверную, * Матерь Бога нашего сущую. * Темже с Гавриилом Тебе зовем: * радуйся, Благодатная.

Слава, и ныне, глас и подобен тойже:

Красоту девства Твоего и пресветлую чистоту Твою * Гавриил показав нам, возопи ныне, поя Тебе песни Твоея предначатие дивное, всеизрядное, * и сие начерта на дщице каменной чудно, абие невидим бысть. * Темже Тя почитаем.

Степенна 1-й антифон 4-го гласа.

Прокимен, глас 4: Помяну имя Твое * во всяком роде и роде.

Стих: Слыши, Дщи, и виждь, и приклони ухо Твое.

Всякое дыхание:

Евангелие от Луки, зачало 4.

Во дни оны, воставши, Мариам, иде в горняя со тщанием, во град Иудов. И вниде в дом Захариин, и целова Елисавет. И бысть яко услыша Елисавет целование Мариино, възграся младенец во чреве ея, и исполнися Духа Свята Елисавет. И возопи гласом велиим, и рече: благословена Ты в женах, и благословен плод чрева Твоего. И откуда мне сие, да прииде Мати Господа моего ко мне? Се бо, яко бысть

глас целования Твоего во ушию моею, възграся младенец радощами во чреве моем. И блаженна Веровавшая, яко будет совершение глаголаным Ей от Господа. И рече Мариам: величит душа Моя Господа, и возрадовася дух Мой о Бозе Спасе Моем. Яко призре на смирение Рабы Своея, се бо, отныне ублажат Мя вси роди. Яко сотвори Мне величие Сильный, и свято имя Его. Пребысть же Мариамъ с нею яко три месяцы, и возвратися в дом Свой.

По 50-м псалме стихира, глас 2. Самогласна:

Благовести Гавриил Благодатней прежде: * Радуйся, Невестная Отроковице и Неискусобрачная! * Ныне же, явлься в странном образе монашествующему, * песнь воспе новую. * Тогда благовестив сказа Тебе, Чистая, * ныне воспе Тя чудно, * яко Пренепорочную и рождшую, Дево, Господа.

Канон Богоматери, глас 4.

Песнь 1

Ирмос: Отверзу уста моя, * и наполнятся Духа, * и слово отрыгну Царице Матери, * и явлюся, светло торжествуя, * и воспою, радуяся, Тоя чудеса.

Афон, иже наречеса Святая Гора, Всенепорочная, Чистая, якоже прорекла еси, ныне светло празднует Тебе, Святей воистинну Горе сущей, и Божественное совершает днесь Тебе торжество.

Божественным присно Гавриил тайнам Твоим изрядным служит чудно, о Всенепорочная, темже и ныне, Дево, Твоя песни, радуяся, поет предначатие.

Не престаеши, Всенепорочная, совершати присно рабом Твоим преславная чудеса, Мати Чистая, и во вся времена изливати благодеяния, Пресвятая, яко Благодетельница наша.

Како изреку величайшее, совершенное тобою, Архангеле, близ скита Карейскаго чудо, егда научил ны еси твоим явлением песни достойней Богоматере?

Песнь 3

Ирмос: Твоя песнословцы, Богородице, * живой и независтный Источнике, * лик себе совокупльшия, духовно утверди, * в Божественней Твоей славе * венцев славы сподоби.

Приспе время собратися всем отцем в храме Протатстем, всенощную совершити хвалу, тогда Божественную песнь Твою, Чистая, воспеваает Архангел.

Прииде со иными и старец онаго послушника инока, и сему единому оставшуся Гавриил Архангел явися в подобном образе, предначиная песнь Твою.

Приложение творяше к песни Твоей, яко предначатие, Чистая, тоя, юже прежде воспе Косма, Божественный Твой служитель, глаголя, яко тако обычай есть им начинати песнь Твою.

О, чудес Твоих страшных, Архангеле Божественный Гаврииле! Како во иночестем образе песнь воспел еси Богоматери днесь и, яко подобаше, возвеличил еси?

Ин кондак, глас 8:

Архангельский глас вопиет Ти, Всецарице: * достойно есть, яко воистинну, * блажити Тя, Богородицу, * Присноблаженную и Пренепорочную * и Матерь Бога нашего.

Седален, глас 4.

Подобен: Удивися Иосиф:

Удивися инок Ангела песни, * странно поющего туо пред Твоею песнию, о Чистая, * явльшуся сему во образе подобнем, * а понеже инок написатися желаше оней, * на дщице каменной рукою чудно начерта, и невидим бысть. * Оттоле проповедася всем песнь сия, * еже Богородицу Тя славити, Всенепорочная.

Песнь 4

Ирмос: Неизследный Божий совет, * еже от Девы воплощения * Тебе, Вышняго, пророк Аввакум усмотря, зовяще: * слава силе Твоей, Господи.

Достойно, предначинаше, яко воистинну есть блажити Тя, Пречистая, Богородицу, Присноблаженную и воистинну Пренепорочную и Бога Матерь Всенескверную.

Предначинательную сию песнь Божественному Гавриилу странно поюще, удивляшеся слушай инок, а понеже вопрошаше, тако пети, рече, обыкохом ²⁶.

Глаголати и ему тако повелеваше Гавриил сие предначатие, таже пети песнь Космы Божественную и всех научити сему, Божественный рече Архангел.

Занеже проси инок, Гаврииле Божественне, написати песнь, юже услыша, ты начертал еси абие на дске каменной, Архангеле. Слава неизреченной силе твоей.

Песнь 5

Ирмос: Ужасошася всяческая * о Божественной славе Твоей: * Ты бо, Неискусобрачная Дево, * имела еси во утробе над всеми Бога * и родила еси Безлетнаго Сына, * всем воспевающим Тя * мир подавающая.

Ужасеся человек дивным чудесем, егда чудо узре, яко дска каменная начертася и внезапно собеседующий ему невидим бысть, Гавриил, славный и честный Архистратиг.

Старец, егда во утрие в келлию свою возвратися и егда странная сия услыша, дску же каменну узре, рукою начертанну, взял же абие с учеником сию, принесоша Горы начальствующим.

Знаемы и всем известны быша сия чудеса, Дево, понеже дску каменную абие в царствующий град торжественно отслаша Горы начальствующии, во еже славити Тя всем.

Стекошася вси во убогое обиталище, в немже странное чудо содеяся, и Твоей иконе, пред неюже воспета бысть песнь, Всечистая, благоговейне покланяющеся, единогласно уставивша в Протате той хранитися.

Песнь 6

Ирмос: Божественное сие и всечестное * совершающе празднество, * Богомудрии, Богоматере, * приидите, руками восплецим, * от Нея рождашася Бога славим.

С неизреченною вси стекошася радостию и веселием, еже взяти честную икону Твою, иереи, и монашествующии, и все Горы множество, Пречистая.

Божественную Твою икону сию со всяким благоговением держаще отцы вси, плещуще, с песнями и пенями внесоша в Божественный храм Твой, Пречистая.

Дево! Стояние всенощное совершиша, любовию Тебе чтуще и Архангела, песнь Твою возвестивша, и ныне мы такожде вас вкупе почитаем.

Отцы Божественнии, с песньми, по тайнодействию, взявше Божественную Твою икону, внутрь храма, в невходимая, со многим благоговением поставиша.

Кондак, глас 4.

Подобен: Явился еси днесь:

Празднует днесь весь Афон, * яко песнь прият от Ангела чудно * Тебе, Чистой Богоматери, * Юже вся тварь чтит, славящи.

Икос: Ныне да веселится множество отцев Афона: се бо Деве прежния песни, юже чудно воспе Ей Косма, Божественный песнопевец, Гавриил ныне поет предначатие, иже: Достойно есть яко воистинну,— глаголаше иноку,— блажити Тя, Богородицу, Присноблаженную и Пренепорочную и Матерь Бога нашего; сему повелеваше, да тако вси предначинают Твою песнь. И, сию начертав рукою на дске каменной, внезапно бысть невидим. Инок же, дивясь, воспеваше, якоже научися, чистую Богоматерь, Юже вся тварь чтит, славящи.

Песнь 7

Ирмос: Не послуживша твари Богомудрии * паче Создавшего, * но, огненное прещение мужески поправше, * радовахуся, поюще: * препетый отцев Господь и Бог, благословен еси.

Преизрядную честь воздаяху вси отцы, и прежнии и нынешнии, сей иконе Твоей Божественней, Пренепорочная, праведнейше: чести бо премногия удостоися преславно.

Велия благодати удостоися Божественная икона Твоя, Пренепорочная, ясно бо пред нею Твоя песни предначатие первее возгласися благоволением Твоим. Темже по долгу ныне сей с любовию покланяемся.

Не боготворим икону Твою, Пречистая, якоже на ны клеветуют, но относительно чтим, Пренепорочная, сию, радующеся, лобызаем чествовательно, раби Твои, ныне же и во веки.

С Тобою, Пресвятая, не престаем чтити и славнаго Гавриила, нас ныне песни Твоей научившаго, иже и прежде, Тебе возглашая, взываше: радуйся, Благодатная.

Песнь 8

Ирмос: Отроки благочестивыя в печи * Рождество Богородичо спасло есть: * тогда убо образуемое, * ныне же действуемое, * вселенную всю воздвизает пети Тебе: * Господа пойте, дела, * и превозносите Его во вся веки.

Отrockом благочестивым подражающе, Богородице, о чудесех Твоих, яже творит Господь во славу Твою, Пречистая, воспевающе, поем: Господа пойте, дела, и превозносите во вся веки.

Воистинну благословен, иже сподобися услышати Божественныя хвалы Твоя от Ангела, Пресвятая Дево Пренепорочная, якоже Сын Твой благоволи, имже всех научи пети Тя достойно и превозносить Тя во вся веки.

«**Пение**» — по достоянию уставися именовати место оно, идеже совершися сие чудо, якоже нарицание удержася до нас и навсегда, на память, Пречистая, чудесе, яко да воспеваем Тя и превозносим во вся веки.

«Достойно есть» — даже до ныне нарицается ясно и келлия та, в нейже и Божественная Твоя икона, пред неюже первое воспето бысть песни Твоя, Дево Чистая, предначатие, яко да поют Тя вси достойно и превозносят Тя во вся веки.

Песнь 9

Ирмос: Всяк земнородный * да възграется, духом просвещаемь, * да торжествует же Безплотных умов естество, * почитающее священное торжество Богоматере, * и да вопиет: * радуйся, Всеблаженная Богородице, * Чистая Приснодево.

Вси раби Твои, стекаемся во храм Твой Божественный и празднуем, светло совершающе ныне торжество, в летнюю днесь память чудесе Твоя песни восполнения, Богородице, Чистая Приснодево.

Достойно есть,— не престаем, радующеся, глаголати,— блажити Тя, Присноблаженную же яко воистинну и Пренепорочную и Матерь Бога нашего,— от Ангела сим ныне научившися, Богородице, Чистая Приснодево!

Вкупе славнаго и Божественнаго Архангела Гавриила днесь, радующеся, прославляем, благодарственная пения приносяще, дивным чудом всех научившаго Божественней песни Чистая Богоматере, радуйся, таинниче неизреченных, зывающе.

Радуйся, храм Протата преславный, хвалящийся сокровищем всечестныя, Божественныя и благодать точащия иконы единыя Богоматере и Предстательницы Афона: Гора бо сия избранный жребий Ея соделася.

Светилен.

Подобен: Жены, услышите:

Соберитесь, възграйте, светло торжествуйте, * Гавриил бо Божественный монашествующему ныне предста в иночестем образе, * песнь Богоматерню первый провещав в Горе Афонстей, * стяжавшей Ю Предстательницу.

На хвалитех стихиры, глас 1.

Подобен: Небесных чинов:

С Небесных кругов сошед, Гавриил * странным образом явися иноку послушнику, * Твою песнь, о Дево, необычную * ему поя ныне, Архангел, * предначиная ею ту, * юже некогда Косма Тебе воспе.

Гавриил Деве прежде * благовестие с Небесе принес, * возопи: радуйся! * Ныне же странную песнь Ея * чудно Горе Святей возвести, припевая, * еже блажити яко воистинну * достойно есть Всечистую.

Любовию Божественней иконе Твоей * покланяемся, Чистая, * пред неюже воспеса первое * предначатие песни Твоя от Ангела. * Темже верно сию ныне лобызаем * и вкупе Гавриилу Божественному светло празднуем, * яко виновному.

Слава, и ныне, глас 6:

Кто возглаголет силы Твоя, Чистая, * или кто изочтет чудес Твоих множества? * Много и паче естества действуеши Твоя чудеса. * О, великий, яже и ныне соделала еси! * Твоя бо песни предначатие * чрез Ангела, Всечистая, нам предала еси, Дево, * и странно на дщице каменной сему написатися * Ты благоволила еси промышлением Твоим, * еже в песнях величати Тя, Пренепорочная.

НА ЛИТУРГИИ

Блаженны от канона, песнь 3-я и 6-я.

Приспе время собратися всем отцем в храме Протатстем, всенощную совершити хвалу, тогда Божественную песнь Твою, Чистая, воспевае Архангел.

Прииде со иными и старец онаго послушника инока, и сему единому оставшуся Гавриил Архангел явися в подобнем образе, предначиная песнь Твою.

Приложение творяше к песни Твоей, яко предначатие, Чистая, тоя, юже прежде воспе Косма, Божественный Твой служитель, глаголя, яко тако обычай есть им начинати песнь Твою.

О, чудес Твоих страшных, Архангеле Божественный Гаврииле! Како во иночестем образе песнь воспел еси Богоматери днесь и, яко подобаше, возвеличил еси?

С неизреченною вси стекошася радостию и веселием, еже взяти честную икону Твою, иереи, и монашествующии, и все Горы множество, Пречистая.

Божественную Твою икону сию со всяким благоговением держаще отцы вси, плещуще, с песнями и пенями внесоша в Божественный храм Твой, Пречистая.

Слава: **Д**ево! Стояние всенощное совершиша, любовию Тебе чтуще и Архангела, песнь Твою возвестивша, и ныне мы такожде вас вкупе почитаем.

И ныне: **О**тцы Божественнии, с песнями, по тайнодействию, взявше Божественную Твою икону, внутрь храма, в невходимая, со многим благоговением поставивша.

Тропарь, глас 4:

Отцев все Афонское множество, * соберитесь, верно празднующе, * днесь радующесе и светло восклицающе вси в веселии, * Божия бо Мати ныне от Ангела преславно воспеваеся. * Темже, яко Богородицу, присно Сию славим.

Ин тропарь, глас тойже:

Притецем, вернии, со дерзновением * к милующей Царице Богородице * и умильно воззовем к Ней: * низпосли на ны милости Твоя богатя: * Церковь нашу сохрани, * люди во благоденствии соблюди, * землю нашу избави от всякаго обстояния, * мир даруй миру * и спасение душам нашим.

Кондак, глас 4.

Празднует днесь весь Афон, * яко песнь прият от Ангела чудно * Тебе, Чистой Богоматери, * Юже вся тварь чтит, славящи.

Ин кондак, глас 8:

Архангельский глас вопиет Ти, Всецарице: * достойно есть, яко воистинну, * блажити Тя, Богородицу, * Присноблаженную и Пренепорочную * и Матерь Бога нашего.

Прокимен, глас 3, песнь Богородицы:

Прокимен: Величит душа Моя Господа, * и возрадовася дух Мой о Бозе Спасе Моем.

Стих: Яко призре на смирение рабы Своя, се бо отныне ублажат Мя вси роди.

Апостол к филипписиюм, зачало 240.

Братие, сие да мудрствуется в вас, еже и во Христе Иисусе, Иже во образе Божии сый, не восхищением непщева быти равен Богу. Но Себе умалил, зрак раба прим, в подобии человечестем быв, и образом обретеса якоже человек. Смирил Себе, послушлив быв даже до смерти, смерти же крестныя. Темже и Бог Его превознесе и дарова Ему имя, еже паче всякаго имене, да о имени Иисусове всяко колено поклонится небесных и земных и преисподних, и всяк язык исповесть, яко Господь Иисус Христос в славу Бога Отца.

Аллилуиа, глас 8: Слыши, Дщи, и виждь, и приклони ухо Твое.

Стих: Лицу Твоему помолятся богатии людстии.

Евангелие Луки, зачало 54.

Во время оно, вниде Иисус в весь некую, жена же некая именем Марфа прият Его в дом свой. И сестра ей бе нарицаемая Мария, яже и седши при ногу Иисусову, слышаше слово Его. Марфа же молвяше о мнозе службе, ставши же рече: Господи, не брежеш ли, яко сестра моя едину мя остави служити; рцы убо ей, да ми поможет. Отвещав же Иисус, рече ей: Марфо, Марфо, печешися и молвиши о мнозе. Едино же есть на потребу. Мария же благую часть избра, яже не отыметя от нея. Бысть же егда глаголаше сия, воздвигши некая жена глас от народа, рече Ему: блажено чрево носившее Тя, и сосца, яже еси ссал. Он же рече: темже убо блажени слышавшии слово Божие, и хранящии е.

Причастен: Чашу спасения прииму, и имя Господне призову.

Икона Божией Матери именуемая «Достойно есть»

История иконы связана с появлением песнопения Православной Церкви «Достойно есть». Предание, сохранившееся на Святой Горе Афон, повествует, что в X веке неподалеку от Кареи в пещере подвизался старец с послушником. Однажды под воскресенье старец ушел в обитель на всенощное бдение, а послушник остался дома. Поздно ночью неизвестный монах постучался в келлию; послушник впустил его, и они вместе стали совершать псалмопение и молитвы. Во время пения слов «Честнейшую Херувим» гость заметил, что у них поют эту песнь по-другому: добавляют перед «Честнейшую...» слова: «Достойно есть, яко воистинну блажити Тя, Богородицу, Присноблаженную и Пренепорочную, и Матерь Бога нашего». Когда монах стал петь это песнопение, икона Божией Матери «Милующая», которая была в келлии, вдруг засияла необыкновенным светом, а послушник почувствовал в душе какую-то особую радость и заплакал от умиления. Он попросил гостя записать столь дивную песнь, и тот начертил слова этаго песнопения перстом на каменной плите, которая под его рукой сделалась мягкой, как воск. Странник, назвав себя Гавриилом, сразу же стал невидим, а икона еще некоторое время излучала чудесный свет. Она была перенесена в соборный храм Кареи и сейчас находится там в алтаре на горнем месте.

Известны и другие типы иконы «Достойно есть», в частности, широко распространившаяся на Руси с XV века икона с изображением молитвенного

обращения к Богородице ангелов и святых. Вокруг изображения обычно помещается сам текст молитвы «Достойно есть».

Подобные изображения встречаются и на особых сосудах – панагиарах, ибо молитва «Достойно есть» является неотъемлемым элементом чина Панагии. Этот чин и донныне сохраняется в монастырях. Сущность его в том, что на монастырскую трапезу торжественно, в особом сосуде панагиаре, переносится из храма, где совершалась Литургия, хлеб в честь Божией Матери, который по окончании трапезы раздробляется и раздается братии. Смысл этого чина в том, что в нем прославляется Пресвятая Богородица, наша Заступница перед Богом, Которая родила Хлеб Небесный – Христа, Хлеб Жизни, питающий наши души.

В XVI–XVII веках Богородичный хлеб было принято вкушать и тогда, когда Литургия не совершалась.

Частицы Богородичного хлеба переносились в особых складнях, которые носили на груди. Эти складни с изображением Богоматери стали тоже называть «панагиями», и впоследствии панагии – нагрудные изображения Божией Матери – стали носить епископы.